

船山遺書

第三函
第六冊

禮記章句卷十三

衡陽王夫之譔

玉藻

此篇備記冠服之等章而交接容貌稱名之儀附之以見世降禮壞苟簡之習日移而三代之法服幾無可傳焉王者修明章服以爲典禮之本亦尙於此攷而知之非小補也易曰黃帝堯舜垂衣裳而天下治蓋取諸乾坤衣裳之義繫於三極之道亦甚重矣人之所以爲人而別於禽獸者上下之等君臣之分男女之嫌君子野人之辨章服焉而已矣否則君臣混處男女雜穢而君子之治野人也抑無以建威而生其恭故曰天尊地卑乾坤定矣方以類聚物以羣分吉凶生矣在天成象在地成形變化見矣衣裳者乾坤之法象人道之紀綱寒而毛暑而裸於人亦便安矣而君子甚惡其便安者唯其裂法象而乾坤且以毀也習於禽獸便而安焉乃以疑先王之法服繁重侈博寒不足溫而暑不足清則人道之僅存者漸滅濱盡而不亦悲乎故益以知此篇之傳非小補也凡

三十章

天子玉藻十有二旒前後邃延龍卷以祭

有于敕反卷與
衰通古本反

玉琢玉珠藻周禮作纁雜采組也玉藻藻而貫玉繫於冕上版十有二旒前後皆然每旒十有二玉延版上覆巾玄衣纁裏前後垂邃深也孔氏以叔孫通所制漢冕放之延廣八寸長尺六寸下垂深長故曰邃延也龍卷袞冕九章龍爲之首祭者祭宗廟也宗廟之祭以昭世守故盛飾焉

玄端而朝日於東門之外聽朔於南門之外

端本冕字之誤美福
反朝如字陟遙反

玄冕玄衣而冕裳無文唯衣刺黼大夫玄冕三旒天子雖玄冕仍十有二旒朝日春分迎日於東出而祭之也東門國門聽朔者月朔日以特牲告於太廟而頒一月之政也南門雉門每月之政縣於象魏象魏在兩觀之間雉門之外所謂外朝也朝日聽朔皆以欽天行政故其服卑玄冕王者之下冕也

閏月則闔門左扉立于其中

閏月者月有而歲無之故闔左扉啓右扉以順陰也立者立而頒閏之朔也凡

聽朔皆立於此互見之門亦南門也中酌左扉之中也然則十二月之聽朔於南門門扉皆啓而立兩扉之中與閏月之服蓋亦玄冕

皮弁以日視朝

朝直遙反

皮弁者以白鹿皮爲冠象上古也王之皮弁會五采玉璫用玉十有二日視朝常朝於內朝也視朝以治人服愈降故不冕

遂以食日中而餞奏而食日少牢朔月大牢五飲上水漿酒醴醢

少詩照反大他蓋反

遂以者仍皮弁服也朝食以禮食故仍弁以重之餞謂不更殺也奏奏樂午餞奏則朝食之奏可知也朔主乎月故稱朔月朔食大牢三侑有金奏上水以玄酒爲上尊

卒食玄端而居

卒子律反

玄端玄冠玄衣黃裳居燕居於內寢服益約矣
勤則左史書之言則右史書之御瞽幾聲之上下

此通視朝燕居而言左史大史右史內史也必書者以記得失傳後世人君知

警懼免疚過也御侍也瞽大師幾微察也聲者語言之音響上不欲抗下不欲墜所謂聲律身度也

年不順成則天子素服乘素車食無樂

自修省且先民儉也

右第一章 此章記天子之禮

諸侯玄端以祭裨冕以朝皮弁以聽朔於大廟朝服以日視朝於內朝

端本冕字之誤美福反朝

直遙反下同
大他蓋反

裨副也天子大裘之冕爲上冕其餘皆副也公衮冕侯伯鷩冕子男毳冕朝朝於天子也盛飾以昭王命也其他則皆下天子一等諸侯皮弁亦用玉或九或七或五詩云會弁如星是已聽朔者天子頒朔於諸侯受而藏之大廟月朔則以特牲告廟而卽廟門頒行之朝服玄衣素裳內朝在路寢門外

朝辨色始入君日出而視之退適路寢聽政使人視大夫大夫退然後適小寢

釋服

朝日常朝也入羣臣入也視朝以禮見羣臣聽政則大夫有政者入議之餘皆伺於外事畢而後羣退小寢燕寢在路寢後釋服釋朝服服玄端

又朝服以食特牲三俎祭肺夕深衣祭牢肉朔月少牢五俎四簋子卯稷食菜羹

少詩照反稷食之食祥吏反

特牲豕也三俎豕牢鼎也魚兔腊陪鼎也鼎各一俎祭肺加於牢俎上以祭夕夕食深衣玄冠祭牢肉者因朝所殺之牢餘切爲小段加肉俎上以祭無祭肺也五俎羊豕牢鼎二羊腸胃鼎一魚麋腊陪鼎三鼎各一俎四簋黍稷稻粱日食則黍稷二簋而已稷食去黍唯一簋也菜羹無肉天子朔食大牢十有二俎牢俎九陪俎三食用六穀凡十二簋凡此類皆互舉而可推也

夫人與君同庖

庖牢也后亦與王同庖也此及下節因諸侯之食禮而推廣言之

君無故不殺牛大夫無故不殺羊士無故不殺犬豕君子遠庖廚凡有血氣之類

弗身踐也

遠于怨反踐慈反

君國君故賓祭也犬羹肉遠者置於己所不至之處庖殺牲處廚烹割處踐與翦通殺也昭儉以立義遠殺以全仁君子之道也

至于八月不雨君不舉年不順成君衣布摺本關梁不租山澤列而不賦土功不

興大夫不得造車馬

衣於既反列力制反造昨到反

至於八月者數不雨之期凡八月也舉殺牲而以樂侑也木竹筩而象飾其本土筩也梁橋也租稅也不租者通商以致粟也列與厲通闌遮而禁非時之采伐不賦者廣鮮食備材木以養生送死也造車馬者造駕馬之乘車

右第二章 此章記諸侯之禮

卜人定龜史定墨君定體

定占視而詳定其吉凶也龜當作坼墨兆也其占百有二十墨兆之暈也體兆紋之俯仰前後左右也體有吉凶墨有大小坼有微顯尊者視其兆象知其大概而已大小微顯占驗之細則有司存君子之所求於神明者敬而不瀆所由異於小道之察察也

右第三章 此下三章皆雜記禮文之一曲而無次第疑有脫誤姑逐段分章而爲之釋禮文闕失之餘藉以綴拾舊聞可爾

君羔臂虎犢大夫齊車鹿臂豹犢朝車士齊車鹿臂豹犢

犢除力反齊側皆反朝直遙反

臂覆答也車中以小竹爲簣而立其上謂之答上用皮爲臂覆之以承足犢緣也羔臂虎犢舊說以爲君之齊車然則君之餘路及士之朝車必各有異此蓋闕文而他亡所攷矣

右第四章

君子之居恆當戶寢恆東首若有疾風迅雷甚雨則必變雖夜必興衣服冠而坐

首舒救反

君子有德者之稱居燕坐也當戶鄉明也東首者燕寢南鄉衽席必橫設之以避不祥在戶東牖西東首首當戶亦如晝坐且鄉牖以知曙也迅速之甚也雷隨電迅發則必震變謂坐必起而更修容也陰陽相薄氣之大變君子定性以貞氣不與化而俱變則莫能爲之沴也

右第五章

日五盥沐稷而醑梁櫛用櫛櫛髮晞用象櫛進襪進羞工乃升歌

襪其既反

五盥者朝夕視朝及三食已皆濯手也沐則三日一舉醑每晨洗面也稷梁用其泔也櫛方沐而櫛也櫛今黃楊木櫛櫛密而理澀利以沐晞晾也晾髮復櫛之使速乾也象櫛疏而理滑利晞進襪進羞皆言沐也襪一作襪許慎曰小食也蓋用酒醑以補陽氣使上升也羞籩豆之食以佐飲也升歌倚瑟而歌於堂上用樂者亦以助陽氣此皆言諸侯之沐禮也

浴用二巾上絺下綌出杆履蒯席連用湯履蒲席衣布晞身乃履進飲

連郎反

二巾以摩挲去垢也自臍以上用絺下用綌貴上賤下也蒯菅也杆盆也在漚內以濯身濯已出杆履菅席取其澀也連澆淋也淋湯澆足不入杆中足尤賤也足淨乃履蒲席蒲席坐席衣布密布可爲衣者進飲或酒或漿無羞不歌者浴事賤於沐也

右第六章 此章記人君沐浴之禮大夫以下降殺之節亦可因是而推也

將適公所宿齊戒居外寢沐浴史進象笏書思對命

齊側皆反

適公所謂因事而朝如孔子沐浴論討陳恆之類也宿先夕史庶人在官者象笏魚須文竹飾之象也思所欲言者對酬君問命君所先詔者也書之以備遺亡不審

既服習容觀玉聲乃出揖私朝輝如也登車則有光矣

觀古亂反輝許歸反朝直遙反

既服易朝服畢也容觀容可觀者也玉佩玉行中節則玉聲和也揖私朝者家臣待於庭揖之而行也敬整而暇則從容自得神氣充盈可以動人主而成上交矣劉曄有言對明主須用精神庶幾近之輝如容貌有光神采及人也

右第七章 此章記人臣因事見君之儀其每日趨朝雖不必備齊戒沐浴之節而必敬以莊者則亦同也

天子摺珽方正於天下也

摺插於帶也天子之笏曰珽考工記謂之大圭長三尺杼上終葵首終葵椎也其首如椎頭四角正方無所詘殺方正於天下者示無私之義

諸侯茶前詘後直讓於天子也

茶傷魚反

諸侯之笏曰茶以象骨爲之取舒遲畏慎之義上曰前下曰後謂之前後者自搯而言之也詘角殺直廉方不殺也讓退遜之意

大夫前詘後詘無所不讓也

大夫之笏以象飾竹竝下亦殺其角無所不讓純乎臣也

右第八章 此章記珽笏之制

侍坐則必退席不退則必引而去君之黨

侍坐侍君坐退移席向後也不退君命勿退也引卻也去遠也黨近君處也卻坐盡後不敢逼近於君也

登席不由前爲躡席徒坐不盡席尺讀書食則齊豆去席尺

爲子僞反

席有首尾前席首也布席之法首近君從下而升不由前也由前則是躡踐席端矣徒坐謂非讀書及食時不盡席尺卻後一尺也齊與席邊緣齊也古者書以簡冊置席外地上豆食豆也去席尺復卻坐一尺伸臂適相及也

若賜之食而君客之則命之祭然後祭

客之燕禮所謂命爲賓也燕則宰爲主人故不待命而祭賜食君自爲主則必命而後祭不敢以賓禮自居也唯大夫爲客卿則否

先飯辯嘗羞飲而俟

飯扶晚反下同辯卑見反

此君不命爲客之禮先飯不祭也飲醕食也飲須待飯畢今亦以嘗故而先飲俟君之食而更食也

若有嘗羞者則俟君之食然後食飯飲而俟君命之羞羞近者命之品嘗之然後唯所欲凡嘗遠食必順近食

有嘗羞者或膳宰或羣侍食而長者一人嘗耳飯飲而俟謂三飯後飲而不飧以待君也羞豆實品嘗逐品皆食順近者先近而後及遠不貪所欲

君未覆手不敢飧君既食又飯飧飯飧者三飯也

覆手拱也食已復其常度而拱也飧以飲澆飯連進之也君食未畢不敢飧不先飽也既食食畢而覆手也又飯飧者先已三飯而醕今又飧而三飯也君既

食而殮若未飽欲君之更食然

君既徹執飯與醬乃出授從者

飯如字從才用反

飯醬所食之餘也授從者已復入

凡侑食不盡食

靈食之食詳吏反

侑食君食而因命之食非賜也不盡食者食不爲己設不敢盡也

食於人不飽唯水漿不祭若祭爲已僕卑

此因侍食而槩及之也人敵體之稱已太也僕厭也使臣於主君雖漿亦祭施於敵體者則過自厭伏卑屈矣

君若賜之爵則越席再拜稽首受登席祭之飲卒爵而俟君卒爵然後授虛爵

于卒

反律

此因食而賜之醕爵也授虛爵授之贊者俾反於筐

君子之飲酒也受一爵而色洒如也二爵而言言斯禮已三爵而油油以退

酒典反

言反語

此謂君燕之而命爲賓也三爵者獻爵一酬爵二酬爵一不舉而亦數者以禮言也洒如肅敬也言言和敬也斯猶如也已畢也油油悅敬也受獻禮重故肅將酬則以和先之酬舉而歡交故悅容色各不爽其節也退謂禮畢取俎以出也獻酬禮終不敢貪惠故君雖有後命而必姑退

退則坐取屨隱辟而后屨坐左納右坐右納左

辟反

此通侍坐侍食及燕而言退出也凡屨不升於堂隱辟俛而逡巡也

右第九章 此章記大夫侍君之禮蓋衣服制度與威儀相表裏故類記焉

凡尊必上玄酒

上列於酒之上也面尊以南爲上側尊以西爲上

唯君面尊

君席在阼尊設於兩楹閒南北列之尊有鼻爲面鼻東鄉與君相面示君專有此酒以惠臣下也

唯饗野人皆酒

饗野人蜡飲也皆酒無玄酒也

大夫側尊用楸士側尊用禁

側尊尊在側也主人席在阼西鄉尊於房戶之間東西橫陳主人不得專此酒與客共之楸有四周禁加足公尊設豐而已

右第十章 此章記尊制

始冠緇布冠自諸侯下達冠而敝之可也玄冠朱組纓天子之冠也緇布冠纁綌

諸侯之冠也

始冠冠而之冠古亂反餘如字

下達達於士也諸侯終喪以士服見天子故始冠與士同加纁綌而已其再加則皮弁朝服素韠三加則玄冕天子始冠以玄冠朱組纓再加皮弁三加袞冕大戴禮所謂天子擬焉者是已纁采也綌亦纓也自其下垂者謂之綌

玄冠丹組纓諸侯之齊冠也玄冠綦組纓士之齊冠也

齊側皆反

丹亦朱也綦雜采亦纁也言天子以諸侯之齊冠爲始冠諸侯之始冠其纓知士之齊冠也不言大夫者大夫與士同

縞冠玄武子姓之冠也縞冠素紕既祥之冠也垂綏五寸惰遊之士也玄冠縞武不齒之服也居冠屬武自天子下達屬之欲反

縞白生絹也武冠下卷圍額際者橫裁之其上直者爲冠身姓孫也祖父有服子孫無服或雖有服而已除從尊者之側不敢純吉則武吉而冠凶以居焉素熟絹也紕緣冠兩旁及武下也既祥謂禫月垂綏五寸其冠亦縞縞冠無綏此獨加綏示非凶服爲罰冠也惰遊之士周禮所謂罷民也收之園土三年之中著此縞綏之冠三年之後雖出園土終身不齒則爲易玄冠而縞武綏亦縞焉凡此冠武異色非凶則罪若燕居之冠冠武相連屬而皆玄自天子至於庶人無以異也

有事然後綏

有事謂齊也齊冠則綏以盡飾燕居玄冠不綏

五十不散送親沒不髦大帛不綏

散蘇坦反

散經端之麻散垂不結也送送親葬也送葬散麻既葬而後結之五十始衰不

備禮也髦人子之飾親沒則脫之大帛白冠也國有凶禍則君冠之不綏去飾也

玄冠紫綏自魯桓公始也

諸侯之齊冠續綏而紫之徒爲豔飾非禮也魯蓋齊字之誤傳稱齊桓公好紫而凡記言魯君類不稱國知此當爲齊君矣

右第十一章 此章記冠制

朝玄端夕深衣

此謂大夫士私朝及燕居之服

深衣三袪縫齊倍要袷當旁袂可以回肘

齊卽夷反要於宵反

此下二節皆記深衣之制與深衣一篇互相發明其制備矣袪袖口也三袪者如袖口三圍之廣也袪尺二寸圍之二尺四寸三其圍七尺二寸深衣之制上衣用布二幅前後屈之爲四幅幅一尺八寸四幅凡七尺二寸以屬於裳齊裳下邊也要古腰字衣長一尺八寸正當腰際四幅之廣每幅二尺二寸縫合成